

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

Z A K O N

**O DOPUNI ZAKONA O UTVRĐIVANJU NASELJENIH MJESTA I O IZMJENAMA U
NAZIVIMA NASELJENIH MJESTA U ODREĐENIM OPĆINAMA**

Sarajevo, decembar 2015. godine

ZAKON

O DOPUNI ZAKONA O UTVRĐIVANJU NASELJENIH MJESTA I O IZMJENAMA U NAZIVIMA NASELJENIH MJESTA U ODREĐENIM OPĆINAMA

Član 1.

U Zakonu o utvrđivanju naseljenih mjesta i o izmjenama u nazivima naseljenih mjesta u određenim općinama - Prečišćeni tekst („Službeni list SRBiH“, br. 24/86, 33/90, 32/91 i „Službene novine Federacije BiH“, br. 14/04, 59/05, 68/05, 81/11 i 25/12) u članu 2. iza tačke 64. dodaje se nova tačka 65. koja glasi:

„65. U Općini Čitluk:

- a) utvrđuje se novi naziv naseljenog mjesta Mostarsko Cerno“

Član 2.

Naseljeno mjesto Mostarsko Cerno izdvaja se iz naseljenog mjesta Služanj.

Član 3.

Općinsko vijeće Općine Čitluk će u roku od šest mjeseci od dana stupanja na snagu ovog zakona, uskladiti svoje propise o nazivima i granicama naseljenih mjesta s odredbama ovog zakona.

Član 4.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

O B R A Z L O Ž E N J E

NACRTA ZAKONA O DOPUNI ZAKONA O UTVRĐIVANJU NASELJENIH MJESTA I O IZMJENAMA U NAZIVIMA NASELJENIH MJESTA U ODREĐENIM OPĆINAMA

I. - USTAVNI OSNOV

Ustavni osnov za donošenje ovog zakona sadržan je u odredbi člana IV. A. 20. (1) d) Ustava Federacije Bosne i Hercegovine, gdje je propisano da Parlament Federacije Bosne i Hercegovine donosi zakone o vršenju funkcija federalne vlasti.

II. - RAZLOZI ZA DONOŠENJE

U Općini Čitluk je pokrenuta inicijativa za utvrđivanje novog naseljenog mjesta Mostarsko Cerno, a koje bi nastalo izdvajanjem dijela naseljenog mjesta Služanj.

U zahtjevu za utvrđivanje novog naseljenog mjesta Općine Čitluk broj: 02-02-3158/13 od 03.09.2013. godine se ističe da stupanjem na snagu Zakona o matičnim knjigama („Službene novine Federacije BiH“, broj 37/12), dolazi do negodovanja građana iz dijela naseljenog mjesta Služanj, za koji se koristio naziv Mostarsko Cerno. Građani iz ovog naselja su do stupanja na snagu Zakona o matičnim knjigama mogli upisivati činjenice prema svojoj volji, tako su se za matične knjige koje su se do tada vodile za naseljeno mjesto Služanj upisivali nazivi: Mostarsko Cerno, Cerno ili Služanj. Uslijed dosljedne primjene Zakona došlo je do negodovanja većine građana sa područja naselja Mostarsko Cerno koji su Odlukom broj: 16/07/2013 od 16.07.2013. godine pokrenuli postupak izdvajanja naseljenog mjesta Mostarsko Cerno iz naseljenog mjesta Služanj. Ovo u prilog se može istaći i činjenica da je ovaj dio naseljenog mjesta Služanj imao i svoju mjesnu zajednicu, te da postoji i prirodna granica između njih. Postupajući po Zaključku Općinskog vijeća Općine Čitluk, broj: 01-06-82/16-13 od 04.07.2013. godine, a kojim je prihvaćena inicijativa za izdvajanje Mostarskog Cerna iz naseljenog mjesta Služanj, na zboru građana Mjesne zajednice Mostarsko Cerno je velikom većinom glasova donio odluku da se naselje Mostarsko Cerno izdvoji iz naselja Služanj, te bi time bilo zasebno naseljeno mjesto u Općini Čitluk.

III. - OBRAZLOŽENJE PRAVNIH RJEŠENJA

Odredbom člana 1. je propisano da se u Općini Čitluk utvrđuje novo naseljeno mjesto, Mostarsko Cerno.

Odredbom člana 2. je propisano da se novo naseljeno mjesto Mostarsko Cerno, izdvaja iz naseljenog mjesta Služanj.

Odredbom člana 3. je propisano da će Općinsko vijeće Općine Čitluk uskladiti svoje propise o nazivima i granicama naseljenih mjesta s odredbama ovog zakona.

IV. - SREDSTVA ZA PROVOĐENJE

Za provođenje ovog zakona nije potrebno osigurati sredstva u Budžetu Federacije Bosne i Hercegovine.

